

Tributo grandi pa Hubert Booi



ORANJESTAD – Ayera e entierro di Hubert Booi a tuma luga cu a fayece riba 20 di december na un edad di 95 aña. Diasabra tabata e tributo na Cas di Cultura cu hopi musica y discursonan.

Gobernador interino Ella Tromp Yarzagaray a tuma

acto di presencia. Tambe presente tabata prome minister Mike Eman y minister Michelle Hooyboer-Winklaar como minister di Cultura interino. Gobernador di Aruba, Fredis Refunjol a bin condoleer e famia Booi, a titulo personal pasobra e ta cu vakantie. Y e ultimo cu a resta di e tres productor di nos Himno, Padu Lampe, tambe a tuma despedida di su amigo.

Diferente parlamentarionan tambe a presenta y a haci un ofrenda floral di parti di Parlamento y un grupo di scout a yuda cu tur e ofrendanan. Discursonan tabata entre otro di gobernador interino, prome minister y Frank Croes, como e ultimo director di Instituto di Cultura (sr. Booi tabata director di e instituto tambe), cu awe ta Departamento di Cultura Aruba. Jubi Naar a hiba palabra



den number di Ito tromp, ex colega di trabou y amigo di sr. Booi. Lourdes Des Croes a papia den number di Biblioteca Nacional Aruba y di publicacionnan di sr. Booi. Y Nilda Koolman, a papia den number di Unoca y a expresa na famia cu ta spera di mira un exposicion di sr. Booi su cuadranan.

Musica

Tabatin hopi presentacion musical tambe di Albert Croes cu a compania su ru-

man Arlenne Wever Croes riba piano, tanto pa e himno como nan presentacion cu canto. Edjean Semeleer a interpreta e Himno di Boneiro. E coronan De Trupialen y Melange a haci un presentacion tambe y Nelson Sprock cu su caha di orgel a trece ambiente. Mescos cu Rondaya Universal Arubano, Tica Giel acompaña pa Johnny Scharbaay riba piano y Rachel Kraaijvanger hunto cu Richard Dabian. Rincon Boyz a clausura e anochi di tributo. □

